

Oz ei il Di dils malsauns



FEURER



Il Di dils malsauns

Ei ha neviu sur notg. Bunamein in miez meter neiv ha ei dau! Carla selegra dad ir a scola e giugar cun sia amitga Nora ella neiv. En scola sesan ellas ina sper l'otra e Carla vul designar ensemen cun Nora il plan digl iglu ch'ella vul baghegiar. Enzatgei ei denton curios: schiglioc spetga Nora adina avon l'entrada dalla casa da scola per ir ensemen cun Carla en stanza da scola. Oz ei Nora buca cheu. Era cura ch'ei scalina, ei Nora aunc adina buca cheu. Ed era cura che tuts han lur etuis e lur carnets sin meisa, ei Nora aunc adina buca cheu. Forsa sa la scolasta enzatgei. «Nua ei Nora?», damonda Carla. La scolasta para dad esser tresta. Ed ei quei perfin ina larma en ses eglis? «Cars affons», di la scolasta all'entira classa, «Nora ei malsauna. Sia

mumma ha telefonau ed ha detg ch'ella seigi dapi ier sera en spital.» «O, na ..., paupra Nora!», cloman ils affons. «Mo ella vegn segir puspei fitta», di la scolasta. «Jeu hai in'idea!» Carla seglia en pei: «Nus savessen far enzatgei per Nora, per ch'ella vegni aunc pli spert sauna.» Tuts quetan quei ina bun'idea ed entscheivan immediat cun la lavur. Ed els fan buca mo enzatgei per Nora, mobein era per auters affons e carschi ch'ein malsauns – igl ei numnadamein gleiti il Di mundial dils malsauns. Dapi 1993 ei ils 11 da fevrer mintgamai il di per patertgar vid ils malsauns e gidar els. L'idea per in tal di ha igl anteriur papa Gion Paul II giu, cura ch'el sez era ina ga fetg malsauns.

Has ti gia legiu la historia da Luisa che sto ir en spital? La historia anflas ti sin pagina 52 dil suandont cudisch:

- Flurina Plouda, Yvonne Gienal
La famiglia Babulin, Novas aventuras
Lia Rumantscha, 2018
da retrer sin www.liarumantscha.ch



Has ti stuiu ir ina ga en spital?

Enconuschas ti enzatgi ch'ei gest en spital?

Tgei fan tes geniturs, cura che ti eis malsauna ni malsauns?

Fai dil bien


Ideas per il Di dils malsauns:

1

**Fai in video e tarmetta el
alla persuna malsauna.**

Dessegna in maletg.

Scriva ina brev.




Scriva ina poesia.

Fai ina collascha.

Tarmetta ina tschugalata.

**Malegia ni zambregia flurs da
pupi ni cartun. Quellas sas ti
silsuenter regalar alla persuna
malsauna.**



*** In recept per biscuits cun si in smiley anfiar
ti el material dil «Di dil surri».**


**Tarmetta ina carta postala
che ti creeschas cun il
PostCard Creator.**



Tarmetta ina carta postala

3

- 1 Dai en color la carta postala e scriva in bien giavisch.
- 2 Taglia ora la carta e faulda per liung dalla lingua interrutta.
- 3 Tacca ensemen la carta postala.
- 4 Tarmetta la carta.



Tarmetta ina carta postala


4

- 1 Malegia enzatgei sin la carta postala e scriva in bien giavisch.
- 2 Taglia ora la carta e faulda per liung dalla lingia interrutta.
- 3 Tacca ensemen la carta postala.
- 4 Tarmetta la carta.

En famiglia

Ideas tgei far, sche tiu bab ni tia
mumma han la grippa ni sch'els
drovan ina ga ina pausa per star
sauns:

**Prepara enzatgei da magliar
che dat forza, p.ex. ina suppa
ni in pign dessert.**



**Gida da far enzatgei en casa,
p.ex. far cul
tschetschapuorla.**

**Metta ensemen la vestgadira
lavada, p.ex. las soccas ni
ils schigientamauns.**